

B. N. C.
FIRENZE

41

9



41.9

COMEDIE DV
PAPPE MALADE ET
tirant à la fin :

*Où ses regrets, & complaints sont au vif
exprimés, & les entreprises & machina-
tions qu'il a avec Satan & ses supposts
pour maintenir son siege Apostatique, &
empescher le cours de l'Euangile, sont ca-
thegoriquement descouvertes.*

h
q

Traduite de vulgaire Arabic en bon Romman
& intelligible, par Thrafibule Phenice.



AVEC PRIVILEGE.

M. D. LXI.



107.

L' A V T H E V R A V L E-
cteur fidele, S.

LE proverbe du Comique Payen, qui dit que Verite engendre haine, a eu son approbation dès la transgression du premier homme, & tant plus le monde continue, tant plus est-il prattiqué & mis en vſage. Car qui ſont ceux qui ſont les plus hais & detestez des hommes, ſinon ceux qui leur diſent leurs veritez? & qui ſont les plus chers & bien venus entre gens de tous eſtats, ſinon les flatteurs, & ceux qui ſont de vice vertu par leurs applaudisſemens? *A* i, ami Lecteur, il ne faut pas que ie m'attende d'en auoir meilleur marché que les autres, puis que ie me delibere de bien gratter la rongne, meſmes de celuy qui ſe vante qu'il n'appartient à homme viuant de le reprendre, encore que ſa vie ſoit comme vn miroir de toute infamie & abomination. Vray eſt qu'il ne ſcauroit monſtrer lettres de ſa diſpenſe, ſinon eſcrites & ſignees de la griffe de Beelzebul. Et pour tant, ie ſuis content d'encourir ſon indi-

gnation, & de tous ses supposts, pourueu que ie descouure sa turpitude, qui a par trop regné au monde, voire avec vne impunité tres-pernicieuse & dommageable au pource troupeau de Iesus Christ. Ne vous offensez donc point ô Lecteur, de la liberté que ie pren. Car le temps de lumière est venu qu'il faut que la vie ignominieuse de ce monstre infernal, & de to' ceux de sa secte soit descouuerte, comme Dieu l'a iadis predit par son Prophete Nahum, parlant en ceste sorte à ses aduersaires en la personne des Niniuites, A cause de tes fornications, ô paillarde de bonne grace, maistresse en forcelleries, laquelle as vendu les gens par tes paillardises, & les familles par tes forcelleries : voyci i'en ay à toi, (dit le Seigneur des armées): ie rebrasseray tes pans sur ta face, & monstreray aux gens tes parties honteuses, & ta vilenie aux royaumes, &c. Ne vous esbahissez donc si en ce temps que Dieu veut restablir les ruines de son Israel, il se trouue des gens qui descouurent les enormitez de ceste abominable eglise Romaine, lesquelles sont venues au comble,

comble, & sont montees deuant Dieu, qui ha en main sa vengeance toute preste pour exterminer ceste grande paillardise, qui a enyuré tout le monde du vin de sa paillardise, regnant par tyrannie sur le siege de Dieu, duquel il faut maintenant qu'elle soit precipitee en ignominie & confusion perpetuelle. Ne vous esbahissez, di-ie, si l'honneur de cest Antechrist, qui durant le temps d'ignorance a este tenu comme sacré & inuiolable, est à present mis en opprobre & contumelie. Car voyci qui est predict de luy par le mesme Prophete, Tous ceux qui orront ta renommee, claqueront des mains sur toy: car vers qui est-ce que ta malice n'est incessamment paruenue? Or donques, ceux qui sont encore scrupuleux, & qui trouuent ces reprehensions Satyriques trop aigres & violentes, apprennent que les douces & amiables remonstrances dont on a vsé si souuent & de si long temps n'ont de rien serui, & que le mal est tellement creu, qu'il n'est plus question de medicaments lenitifs, ains de cauterés & incisions: encores est-il bien à craindre que le tout ne

pourrisse, tant le mal est enraciné. Que s'il y en a qui s'en offensent, i'espere qu'il ne desplaira pas à la plus part, au moins à ceux qui ayans este iadis empoisonnez du hanap d'abomination de ceste paillarde, ont este gueris par le souuerain Medecin, moyennant l'antidote & contrepoison de sa parole qu'il leur a fait gouster: & quant aux autres qui se plaisent en leur borbier, & qui se creuent les yeux de peur de iouyr de la clarte qui se presente à eux, qu'ils scachent que ce m'est plaisir de leur des-
 plaire. Au reste, quant à ce que i'intitule ce present ieu Comedie, & toutefois ie ne retien point la mode des anciens Comiques, qui ont distingué leurs Comedies en Actes & Scenes, ie laisse au iugement de ceux qui s'entendent en telles choses, à cognoistre s'il ne m'estoit pas aisé de le faire, veu l'argument que ie traite, & les diuers personnages que i'introduy. Toutefois, ayant esgard que i'escruiroye pour les simples, i'ay pensé qu'un fil continuel leur plairoit plus que ces interruptions qui se font és Scenes, & l'artifice qu'on tient és Comedies.

Cependant

Cependant ie n'ay pas laiffé de donner à ce mien ieu ce nom, par ce que le definement de la Papauté qui eft prochain, apporte apres meints troubles & perfecutions repos & conſolation à l'Eglife de Dieu, au milieu de laquelle Ieſus Chriſt, apres que il en aura deſchaffé ceſt Antechriſt, regnera par ſa parole: & lors il y aura matiere de ioye, comme c'eſt le naturel des Comedies d'auoir commencement faſcheux, & iſſue ioyeuſe. Que ſi ce nom deſplaist à quelques vns, qu'ils luy en donnent vn tel qu'ils voudront: quant à moy, ie n'eſpouſe point de querele pour le maintenir, pourueu que ie puiſſe profiter en quelque forte, mettant en auant les abus du Pape & les complots de ſes ſuppoſts, afin que les pources fideles s'en donnent garde, & deteſtent ceſt ennemi de Ieſus Chriſt & de ſa verite. Adieu.

A R G V M E N T.



Le Pape prochain de la mort,
 De se venger fait son effort :
 Et sentant de Dieu la tempeste
 A le ruiner toute preste,
 Consolé par sa mommerie
 (L'enten Pr. trise & Moinerie,
 Qui font ses enfans premier-nais,
 Qu'il a de tant de biens ornez)
 A Satan seul ha son recours,
 Attendant de luy tout secours :
 Lequel voyant son interest,
 Va en tous endroits sans arrest
 Pour gagner gens de toutes guises
 A mettre a chef ses entreprises.
 Et de faict, il trouue des hommes
 (L'ordure du siecle ou nous sommes)
 Prompts & dispos a se loer
 Pour le ciel hautain desclouer
 Et renuerfer, s'il est possible,
 Le throne de Dieu inuincible.
 Scauoir est, vn Ambitieux
 Qui se dresse contre les cieux,
 Et ce de certaine malice,
 Ayant du droict chemin notice :
 Vn Affamé, vn Zelateur,
 Vn Outrecuidé affronteur
 Accompagné de son valet
 Philaute, qui nihil valet,
 Puis vn grand bigot d'hypocrite
 Contrefaisant la chaternite,
 Afin que sous couleur de zele
 Il emplisse son escarcelle.
 Mais en fin tous ces malheureux

Cherront au piege fait par eux,
 Pour souffrir peine perdurable
 Avec leur Chef abominable.
 Lors Dieu avec sa verite
 Viura en toute eternite
 Au milieu de sa pource Eglise
 Que tant on outrage & mesprise,
 Faifant cesser fes cris & pleurs
 Et changeant en ris fes douleurs.

AVX IEVX HIERAPOLITENSES, AV
 GRAND THEATRE NOUVELLEMENT
 SACRE AVX SAINCTES ET SERI-
 EVSES MVSES, EN LA PRESENCE
 DES ILLVSTRES MODERATEVRS
 DE L'ANTIQVE VENEGE, ET DES
 FIDELES LEGATS DV GRAND ROY
 CATHOLIQUE, ENVIRONNEZ D'VNE
 SAINCTE COVRONNE VIRILE.

PROLOGVE.



Dieu gard sages Seigneurs & Dames vertueuses,
 Qui auez ce iourd'huy prins vos faces ioyeuses,
 Pour veoir le poure dieu de terre lamenter
 Et ses supposits aussi en vain se tormenter.

Dieu gard grans & petis, Dieu gard pources &

riches,
 Dieu gard gens sans fouci, Dieu gard chagrins & chiches,
 Dieu vous gard deslabrez, & vo⁹ braues & inistes,
 Soyez tous bien venus, si vous n'estes Papistes,
 Autrement il vaut mieux que vous vous absentiez
 Auant que meints broquars & despits vous sentiez.
 Ce ieu-ci est pour ceux qui le Pape detestent,
 Et contre les abus pour Verite contestent.
 Sus sus donc Huguenaux, que l'on vo⁹ voye en place,
 Pour veoir si vous auez si maigre & triste face
 Qu'on bruit, & si complots dressez pour vous destruire,
 Quand il en est saison vous empeschent de rire.
 le n'enten pas d'un ris profane & sans science,
 Ains partant du repos de bonne conscience,
 Qu'oster on ne scauroit, pour tourment que l'on face,
 A ceux qui ont receu de Iesus Christ la grace.
 Riez donc vostre faoul, de ce ris sobre & saint,
 Oyans les grans regrets de ce pere tresseint,
 Duquel la vogue a fait le faut par la fenestre,
 Tellement qu'il voudroit estre mort, ou a naistre.
 Car il se voit sommé au tribunal de Dieu
 Duquel il a rai & l'office & le lieu,
 Pour la de ses messaits compte & reliqua rendre,
 Et de Christ qu'il a point, son iugement attendre.
 Or pensoit ce brigand, d'éternelle assurance
 Avec mort & enfer auoir fait alliance :
 Mais Dieu, dont le iuste ceil tout remarque & contemple,
 Son sceptre a redressé pour regner en son temple,
 Duquel

Duquel cest Antechrist faisoit vne cauerne
 Pour les bons esgorger, ou bien vne tauerne
 Pour nourrir ses pourceaux, i'enten prestres & moines,
 Recluses & nonnains, & semblables fouines
 Qui le sang des Chrestiens succent incessamment
 Et sans peine & souci vivent opulemment,
 Sous couleur d'oraïson faïsans les chatemites.
 Mais le temps est venu qu'il faut que les marmites
 Grasses soyent mises ius, & ce grand cuisinier
 En enfer par Satan soit mené prisonnier.
 Voyla qui maintenant le tourmente & le mine.
 Si doncques vous voulez luy veoir faire la mine
 Et crier ses helas, chacun de vous se taïse,
 Et pour bien escouter, qu'on se mette a son aïse.
 Ce faisant vous aurez (ie croy) tel passetemps
 Que d'yci fortirez tous ioyeux & contens,
 Fors ce monstre & les siens desquels la conscience
 Estreinte de remors vit en impatience.
 Or ne vous veux-ie pas plus longuement tenir,
 Car ie croy qu'il ne peut plus tarder de venir.

LES PERSONNAGES.

<i>Prestriſe.</i>	<i>L'ambitieux.</i>
<i>Le Pape.</i>	<i>L'affamé.</i>
<i>Moinerie.</i>	<i>L'hypocrite.</i>
<i>Satan.</i>	<i>Le zelateur.</i>
<i>L'outrecuidé.</i>	<i>Verite.</i>
<i>Philaute ſon valet.</i>	<i>L'Eglise.</i>

i

Prestrise commence.



*ERE tressainct, appuyez vous
Sur mon espaule, allez tout dous
De peur d'esmouuoir vostre rheume.*

Le Pape.

*Mon foye est dur comme vne enclume,
l'ay tant la ratelle oppilee!*

*Vne Kyrielle pilee,
Auecques vn Fidelium,
Et de l'Intesperantium,
Vn peu de poudre d'Oremus
Et autant de Te rogamus,
Seruiroit bien de cataplasme.*

Moinerie.

*Pere, ie ne crain que le pasme,
Et si ne fay que tressaillir
Que ne veniez a defaillir:
Ce qu'aduenant, me voyla morte
Ou miserable en toute sorte.*

Le Pape.

*Non, non ma fille, ne te chaille,
Ne crain pas que le cœur me faille.
Car encotes que ie sois vieux,
En despit de mes enuieux
Si viuray-ie iusqu'a la mort,
Et croy que seray le plus fort,
S'il y a foy en mes augures
Et astrologiques figures.*

Satan.

Or tandis que suis yci haut,

En mon billet auiser faut
 Si ie laisse rien de ma charge,
 De peur qu'au retour on ne charge
 D'un gros baston, ou d'une gaule
 Le gippon courant mon espaule.
 Ou bien que pour me faire feste
 On me testonne vn peu la teste.
 Or çà, çà, venez mes maunettes
 (Ie voulois dire mes lunettes)
 Que ie vous pose sur mon nez.
 O que i'en voy bien d'estonnez !
 Mais on diroit que ie suis bien vieux
 D'ainsi me voir chauffer quatre yeux,
 Aussi ay-ie veu en ma vie
 Du bien beaucoup, non sans enuie,
 Mais au pris, i'ay tant veu de maux,
 Et tant enduré de trauaux
 A forger malices & fourbes
 Que i'en ay les espauls courbes.
 Passons outre, le temps est court,
 Voyons vn peu quel bruit il court.
 Memoire de fermer la porte
 Par où les liures on apporte
 Qui font les gens Lutheriens,
 Ou pour le moins bien gros Chrestiens.
 Et qui Diable en viendroit a bout,
 Quand il y a breche par tout ?
 Memoire de dire a Sorbonne
 Que sur tout garde elle se donne
 Des prescheurs sous la cheminee
 Desquels il est fort grande annee.

*C'est vn mandat bien à propos !
 Nos Maistres aiment le repos
 Comme les truyes font leur auge :
 Mais qu'ils ayent viande à bauge,
 Et du vin de theologie
 Dont leur face est si bien rougie,
 Ils scauront dormir & peter,
 Et les gros bis contrepeter,
 Ou coucher avec leur amie,
 Mais de deuoir n'en cherchez mie.*

*Memoire expres de voir en Cour
 Qui c'est qui ha ores son tour,
 Les Huguenaux ou les Papistes,
 Les Libertins ou Atheistes,
 Et faire de tous vn meslange,
 De peur que l'estat ne se change
 Qui iusqu'yci a eu la vogue.*

*Memoire aussi qu'on interroque
 Vn Reuerend fort renommé,
 La soit qu'yci ne soit nommé,
 S'il n'ha pas tousiours bon propos
 De ne laisser point en repos
 Ces Chrestiens nouueaux imprimez
 Iusqu'à ce qu'ils soyent reprimez.
 Je ne scay qu'a fait cest idole,
 Ou ce grand magister d'eschole
 A nostre prince Lucifer :
 Mais iamais ie n'entre en enfer,
 Voire ie perde froc & chappe,
 S'il n'en fait quelque iour vn Pape :
 Au moins sa grande saincteté*

En

En ha bien bonne volonté.

Et quoy? sera-ce tantost fait :

Or ay-ie tout mis en effect

Fors vn item qui est à part

En mon escarcelle à l'escart.

Je croirois bien que cela touche

Quelque chose à dire de bouche :

Si me faut-il scauoir si c'est

Misſiue, procure, ou arrest.

Memoire d'aller viſiter

Et grandement ſoliciter

De ſon deuoir monſieur le Pape.

I'ay grand'peur que la mort le happe.

Il eſt ia bien intereſſé,

Ladre, pourri, vieil, & caſſé.

Si faut-il faire mon meſſage

Pour luy eſchauffer le courage

A tenir bon par monts & vaux

Contre ces maudits Huguenaux.

Or voyci que i'auois obmis

Des items qui me ſont commis.

Je m'y en vay donc tout courant :

Car on dit qu'il ſ'en va mourant.

Que ſi i'y ſuis auant qu'il meure,

Excuse auray de ma demeure :

Mais ſi ſans moy vient à mourir,

Ce fera à moy à courir.

O ſ'il m'eſtoit vn peu permis

De dire vray à mes amis,

Je dirois que la Papauté

Perdra bien toſt ſa royauté,

Et que nonobstant bonne mine
 Le Pape est pres de sa ruine.
 Mais il faut bien que ie me garde
 D'en parler, de peur qu'on ne larde
 Mon eschine à coups de bastons.
 Poures porteurs de rogatons
 Vous n'aurez plus le vent en poupe :
 Adieu marmite, adieu la soupe,
 Adieu bon temps, adieu repos,
 Adieu les verres & les pots,
 Adieu putains, adieu commeres,
 Vous ne verrez plus les beaux peres.

On diroit que i'ay bon loisir,
 De causer ainsi à plaisir :
 Cependant ie ne suis pas sage
 Que ie n'acheue mon message :
 Car si Belzebul me demande,
 Je suis seur de payer l'amende.

Or ça, ie voy le Pere saint
 Qui touffe, qui crache & se plaint
 Accompagné de fils & fille.
 Il faut que ma langue babille
 Bien à point afin de l'induire
 A tous ces Huguenaux destruire
 Qui nous ostent nostre butin.
 I'y emploiray tout mon Latin
 Et si feray tous mes efforts
 A ce qu'ils ne soyent les plus forts.
 Mais quoy? si ie suis bon devin
 I'ay peur que ce ne soit en vain.
 Pere tressaint ie te salue

Par yn

*Par vn prince de grand value
 Belzebul ton Seigneur & pere,
 Lequel entendant ta misere,
 Et le danger où tu es mis,
 Comme au ineilleur de ses amis
 M'enuoye pour te secourir.*

Le Pape.

*Mon aini, ie m'en vay mourir,
 C'est fait de moy, ie n'en puis plus,
 Et suis desia comme perclus:
 Puis si le corps ha meints tourmens,
 L'esprit n'ha moins d'estonnemens.
 Mais quoy Satan, qu'est-il de faire
 En vne si pressante affaire?
 Vne fois ie voy du tout bas,
 (Si les coups en brief ne rabas)
 Mes clefs, ma chaire & ma couronne,
 Voire ma propre personne.
 l'ay eu d'estranges visions
 Seroyent-ce point illusions?
 l'ay veu l'Ange de ce Iesus
 Tenant vn glaiue nud là sus,
 Qui disoit d'une horrible voix,
 Escoutez moy, Princes & Rois
 Tures du hanap inhumain
 De ce faux Antechrist Romain,
 Scachez que la grand cruauté
 De ceste infame Papauté
 Et de ceux qui l'ont supportee
 Deuant l'Eternel est montee,
 Tellement que son ire est prest*

b.i.

De vous tomber dessus la teste.

*Tout depuis ces tristes propos
le n'ay eu plaisir ne repos.*

*Car vn ver sans cesse me ronge,
Et rien que meschef ie ne songe.*

*l'ay lù dedans mille bourreaux,
l'enten des enfers les courreaux
Croster pour m'appeler à conte,
Dont la sueur au front me monte.*

Ha Satan, tu m'as bien deceu.

*Vray est que i'ay de toy receu
Honneur, credit, & grand'cheuance,*

*Voire vne suprefme puissance
Par laquelle i'ay fait la guerre*

*Aux grands potentats de la terre,
Me faifant adorer pour Dieu*

Iufques à me feoir en fon lieu :

Mais que me fert la iouiffance

De cefte mondaine plaifance

Puis que l'iffue en eft mortelle

Et caufant misere eternelle ?

Preftriefe.

Voyla vne extreme douleur

Qui me fait changer de couleur :

Car fi elle dure ainfi forte,

le crain fort qu'elle ne l'emporte.

Moinerie.

Mon frere, i'ay mauuais prefage

Au changement de fon visage.

Voyez qu'il eft verd, rouge, & inde

Comme le gofier d'un coq d'Inde :

Pour

*Pour Dieu taster vn peu son pouls.
 Helas s'il meurt où irons-nous?*

Prestrise.

*A Satan, nostre ancien maistre,
 Auec qui scaurions-nous mieux estre?
 Car luy mort, qui nous voudra veoir
 Et encores moins recevoir?*

Satan.

*Venez, venez, ie vous appreste
 Vn bain pour vous faire la feste.*

*Comment Pater sanctissime,
 Pater reuerendissime,
 Au besoin vous faut le courage?
 Car que ie face vn peu d'hommage
 A ceste diuine pantoufle.
 Ha i'ay quasi perdu le soufle
 Apres ceste hausse qui baisse.*

*On ne scait pas quand ie m'abbaisse
 Ou que ie fay telle pipee,
 Que c'est pour auoir ma lippee.*

*Sus Pere saint, qu'on ait bon cœur.
 Et quoy? vous faut-il auoir peur
 D'vn tas de chetifs trepelus,
 Tant malotrus, tant mal-voulus,
 Qu'on pend, qu'on bruste, & qu'on pourchasse
 Comme poures bestes de chasse,
 Qu'on pille, qu'on tue & saccage,
 Et sur lesquels on met la rage
 De tous les maux qu'on fait au monde?
 Non, non, ie veux que l'on me tonde
 Aussi ray qu'vn enfant de chœur,*

b. ii.

*Si vous n'en demeurez vainqueur.
Tenez bon, Pere, & ne vous chaille,
Vous emporterez la bataille.
Car la chair, le monde & l'enfer,
Beelzebub & Lucifer
Vous feront escorte en tous lieux,
Fust-ce à aller contre les cieux.*

Le Pape.

*Iusqu'yci j'ay adiousté foy
A tes dits, me fiant en toy,
De faict ie suis iusques à tout
De mes souhaits venu à bout.
Mais quoy? si faut-il reuenir
A ce tant triste souuenir,
Que me feras à grand mesure
Payer de mon bon temps l'vsure.
Ie sens dedans ma conscience
Vne terrible inpatience,
Apprehendant incessamment
L'horreur de ce grand iugement.*

Satan.

*Conscience! ò qu'il l'ha fort large,
Quand le pource peuple ainsi charge
De fais, lesquels il ne voudroit
Avoir touché du bout du doigt.
Mais il vaut mieux taire ces choses
Sans descourir le pot aux roses.
Ie souffre tout iusques au temps
Que tous ne seront pas contens.*

*Or ça Pere, declarez-moy
Vos ennuis & si grand esmoy.*

Le Pa-

Le Pape.

Tu sçais Satan l'aise & contentement
 Où i'ay par toy regné fort longuement,
 Et tu m'as veu en tel heur & credit
 Que ie viuois sans aucun contredit,
 Tous m'adoroyent, & n'y auoit personne
 Qui ne tremblast sous ma triple couronne:
 Ie iouissois à gré du temporel
 Et dominois sur le spirituel.
 Bref i'auois mis par ma grande puissance
 Ames & corps sous mon obeissance.
 Mais quand ce faux apostat de Luther
 Contre ma loy se meit à disputer,
 (Ce qu'auant luy deux auoyent voulu faire,
 Que ie fey tost cruellement deffaire,
 C'est à sçauoir ce lean Hus & Wiclef
 Qui quelque peu escornerent ma clef)
 Dès lors mon mal à poindre commença,
 Et oncques puis de croistre ne cessa
 Car il remeit en cours les Euangiles
 Par moy bannis de tous pays & villés,
 Et enseigna qu'on teinst ce Iesus Christ
 Pour seul Sauueur, & moy pour Antechrist,
 Et qu'on receust pour la purgation
 De tous pechez, la mort & passion
 Du Fils de Dieu, & non mes indulgences
 Pleines d'erreurs, fraudes, & violences,
 Monstrant aussi l'abus de mes pardons
 Lesquels ie vend, & s'acquierent par dons.

Satan.

Il n'est point besoin de tourment

b. iii.

*A qui confesse alaigrement.
 O Beelzebul, prince sage,
 Tu iouas bien ton personnage
 Etablissant la Papauté
 Qui le siege à Christ a osté !
 Car elle a le ciel desgarni,
 Et ton enfer d'ames muni.
 Mais i'ay si grand peur que i'en sue,
 Que n'en ayons mauuaise issue.*

Le Pape.

*Or a tant faict ce moine renié,
 Et a si bien mes decrets manié,
 Qu'il a ouuert l'aureille aux simples gens
 Qui de scauoir n'estoyent point diligens,
 Et si croyoyent à credit tous mes faicts,
 Cherchans en moy merci de leurs messfaits.
 Si bien qu'ils sont venus à esplucher
 Mon alchumie, & à me rechercher
 Tant en mes diâs & escrits qu'en ma vie,
 Et ont trouuè que du tout ie deuie
 Du droit chemin, & de la vraye sente
 Que ce Iesus à ses eleus presente.*

Satan.

*Ce qui est vray, mais il ne le faut dire
 Pour n'empescher la marmite de cuire,
 Qui nourrit tant de truyes & pourceaux,
 Et qui vous fait manger les bons morceaux.*

Le Pape.

*Ce n'est pas tout, Satan, tu dois entendre
 Que ceste secte est venue à s'espandre
 Par tous pays, & toutes regions,*

Iusqu'à

*Iusqu'à gagner des gens à legions.
 En premier lieu l'Allemagne seduite
 Par ce Luther, & à sa loy reduite
 M'a quitté là, puis apres l'Angleterre
 A commencé à me faire la guerre.
 Mais il y a vn anglet en Sauoye
 Qui m'a rauì le comble de ma ioye :
 Et cependant pour dire, ce n'est rien,
 Si n'y a-il en ce val terrien
 Ville, pays, prouince, ne contree
 Qui ait ma paix comme ce lieu outree.
 Entr'autres griefs i'auois ma fille France
 Qui m'a tousiours porté obeissance,
 Et m'a esté en tous endroits fidele
 Sans se monstrier en vn seul point rebelle,
 Qu'vn tas de gens sorciers & enchanteurs
 Partis de là, & bien subtils menteurs,
 Par leur babil en erreur ont tiree
 Et de deffous mon aile retiree.*

Satan.

Sorciers !

Le Pape.

Sorciers : voire Sorciers.

Satan.

Comment ?

Le Pape.

*Et comment donc nommerois-ie autrement
 Ceux qui par bien & finement parler,
 Maugré qu'on ait font apres eux aller
 Grans & petis, tant ils scauent bien dire.
 Comme iadis Orpheus par sa lire*

b.iii.

*Tant esmouuoit pierres, forests, & bestes,
Qu'il les rendoit de fuyure toutes prestes.*

Satan.

*A mon aduis pourtant c'est moquerie
Que d'appeler cela forcelerie.*

Le Pape.

*Que diriez vous qu'estans si loin d'yci,
Quand il leur plaist me rendent si transi
Que ie ne scay que dire ne que faire.
En vne fois ils me feront retraire
Mes pieds & mains, si bien que pour mourir
Ie ne scaurois ni mouuoir ni courir.
A l'autre fois me feront tressaillir
De grand frayeur, & mon cœur defaillir,
Tant qu'en mon corps i'ay mille meurtrissures,
Et au dedans deux fois plus de pointures :
Et touteffois ils sont trop loing de moy
Pour me toucher, & faire tel effroy.*

Satan.

*Si est-ce que nul ne peut estre
En cest art-là valet ne maistre
Sinon qu'il soit fait de ma main.
Mais c'est vn acte plus qu'humain
Que ce que vous me racontez :
Et de faict, vous m'espouantez :
Car si de bien pres on se songne
On trouuera que Dieu besongne
Par ces gens-là : si ainfi est,
Mon Prince y a grand interest.*

Le Pape.

Ainfi Satan, pour acheuer mon dire,

Croy

Croy que ie suis en extreme martyre,
 De veoir ainsi ma fille desbauchee,
 Et de mon sein tellement arrachee
 Que i'ay perdu toute attente & espoir
 D'en iouyr plus, & de iamais la veoir.
 Hespagne aussi qui s'est tousiours portee
 Fidelement, est fort solicitee
 De me quitter, & de suyure la Loy
 De ce Iesus, & l'auoir pour son Roy.
 Et qui plus est, i'enten que l'Italie,
 Mon Italie ! à ces gens-ci s'allie,
 Dont peu s'en faut que le cœur ne me fende,
 Et que de dueil deuant toy ne me pende.

Satan.

Non, non, il auroit trop d'affaire,
 Seulement qu'il m'en laisse faire,
 Il verra si ie ne l'accoustre
 Haut & court en guise d'une outre.
 Mais cependant qu'yci ie iase
 Le mal croist, & le feu s'embrase,
 Si bien qu'à faute d'y pouruoir
 On pourroit bien sentir & voir
 Ce qu'on ne veut, & pourtant d'heure
 Entendre y veux, auant qu'il meure.
 Et s'il y a en mon cerueau
 Quelque aduis ou conseil nouveau,
 Mettre me le faut en auant
 Et monstrier que ie suis scauant
 A rompre toutes entreprises
 Qui sont contre mon maistrre prises.

Le Pape.

*Je n'en puis plus, que l'on me couche,
Et que l'on me mette en la bouche
Vn morcelet de pain beni,
Ou le saint corpus Domini,
Et quelque goutte d'eau benite.*

Satan.

*Haro, ie m'enfuy bien viste
Tant ie crain ceste eau là salee.
Or fus, la voy-la auallee,
Je n'ay plus peur que mal me face
Ou que l'on m'en iette à la face:
Je m'en retourne pour entendre
Ou c'est que son mal voudra tendre,
A la mort, ou bien à santé.*

Prestrife.

*Et dea, & dea, Pater sancte,
Parlez vous point à vos enfans?
Vous nous auez faits triomphans,
Voire si richement pourueus
Qu'il n'est pas possible de plus:
Mais lors que pleine iouissance
Attendions de nostre abondance,
Oster nous voulez tout plaisir
Et de tout soulas dessaisir.
Car si vne fois vous mourez,
De mourir sommes asseurez.*

Moinerie.

*Mourir dea, quand on est si aise?
Ie te pry frere, qu'on s'en taise,
Car ie n'en veux ouyr parler.*

Le Pape.

Mes

*Mes enfans il s'en faut aller,
Estes vous pas prests de me suyure?
Et apres moy voudriez vous viure?*

Prestrife.

*C'est vn vray prouerbe de Prestre,
Qu'encores n'est-il tel que d'estre.*

Le Pape.

*Ha cependant que ie r'escoute,
le vien de sentir vne goutte!
Satan, tire moy ce pied droit.*

Satan.

*Ouy da, ce n'est qu'un peu de froid
Qui vous vient d'auoir mal couché,
Ou celle qui y a touché
N'auoit, peut-estre, les mains nettes.*

Le Pape.

le n'en frequente que d'honnestes.

Satan.

*l'enten de vostre chambriere?
Mais tenez le vent de derriere,
Car ie crain par trop le sou-chantre.*

Le Pape.

Helas les reins, hélas le ventre !

Prestrife.

*Ma seur, faisons luy vn clystere
D'un peu de graisse de breuiaire
C'est la chronique passion.*

Moinerie.

*Mais plustost la decoction
D'un libera gringuenoté.
l'en ay vn qui est bien noté*

*Et trottera dedans son corps,
Pour y faire de doux accords.*

Le Pape.

La douleur droit au cœur me monte.

Satan.

*C'est qu'il luy faut venir à compte
De tant de pechez qu'il a faits,
Dont il sent maintenant le fais :
Mais s'il est secouru à coup,
Il n'en mourra pas pour ce coup.*

Moinerie.

*Il est pasmé. Satan apporte
Quelque remede, ou ie suis morte.*

Satan.

*Sus, prenant viftement l'escorce
D'un Salue, pilez-la à force,
Et la passez par l'estumine
Faicte du froc d'une beguine,
Au ius d'un doux Obsecro te,
Et il reuiendra en santé.*

Le Pape.

*A coup à coup que l'on m'emporte
En enfer à la vache morte,
Ou sur un vilain bouc puant
Avec mon gentil chathuant
Que ie nourri en une cage.*

Prestrise.

*Il est bien prochain du passage,
Il resue, tirant à la fin.
Enuoyer nous faut au deuin*

Pour

Pour scauoir qu'il en aduiendra.

Moinerie.

Et quel deuin y entendra

Plus que le diable qui les forge?

Le Pape.

Secourez moy, ventre saint George,

Satan, me faux tu au besoin?

Satan.

Pere saint, ie ne suis pas loin,

Et pense à vous donner secours.

Mais quand i'ay fait tous mes discours,

Le m'y trouue bien empesché.

Car ie croy que c'est le peché

Qui vous naure la conscience:

Et moy, ie n'ay pas la science

D'ofter ce mal ni le pouuoir,

Autre mire vous faut auoir.

Le Pape.

Helas qui donc?

Satan.

A ce ne touche,

Car i'ay qui me ferme la bouche.

Moinerie.

Mais voirement à mon aduis

Si par maniere de deuis

Vous vous confessez vn petit,

Vous recouureriez l'appetit,

Après auoir ietté dehors

La poison qu'auex dans le corps.

Le Pape

Bien donc, approchez vous Prestre

*Avec vostre grande chemise
Pour m'ouir en confessi. n,
Et donner absolution*

Pr

*Pere, i'y vaynent
Vestu de mon accoustrement.
Mais auant que rien entreprendre,
Je vous veux aduertir de rendre
Ce que vostre sainteté tient
D'autrui, qui ne luy appartient,
Dominus benedicite.*

Le Pape.

*Tout beau, vous auez incité,
Criant si haut pres du dormir,
Mon cœur tant malade à vomir.
Ouah, ouah.*

Moinerie.

*Poussez, iettez hors ceste ordure,
Cela vous seruira de cure.*

Prestrise.

*Saint Goguelu que d'infamie,
Je croy que c'est de la mommie,
Car il ressemble à chair humaine
Dont sa pance estoit toute pleine.*

Satan.

*Et pourquoy trouues-tu estrange
Que quelqu'vn rende ce qu'il mange?
Il a tant mangé d'orphelins
En guise de bons poupelins,
Et beu le sang de mainte vefue,
Que ie m'esbahi qu'il n'en creue.*

Moinerie.

Moinerie.

Que ces phleures ont de couleurs :

Elles luy caufoyent de douleurs.

Satan.

Ce sont fraudes,

Erreurs, abominations,

Violences & cruautéz,

Trahifons & defloyautéz :

Ce sont decrets, pardons, & bulles,

Cardinaux, & chapeaux & mulles,

Abbez, Euesques, croffes, mitres,

Moines, Nonnains, conuents, chapitres :

Citations, foudres, tempestes,

Reliques, besaces, & queffes,

Images, cloches, luminaires,

Cimetieres, & presbyteres :

Chasubles, aulbes & estolles,

Murmures, mines, & paroles,

Soupleffaux, tordions, & danses,

Desguifemens & manigances.

Bref, il y a de toutes choses

Au cabinet du Pape enclofes.

Il n'en vomiroit en dix ans

Autant qu'il en refte leans.

Le Pape.

Ouah, ouah.

Prestrife.

Rendez tout fans rien retenir.

Le Pape.

Ha, il ne peut plus rien venir.

L'ay là dedans ie ne fçay quoy

Qui fait que ne suis à requoy,
 Et qui me tient le cœur en jërre.
 C'est ie croy la chaire suinct Pierre,
 Qui ha par trop grande estendue
 Pour estre ainsi à ~~cœur~~ rendue.
 Et i'ay beau faire mon effort
 Si ie la puis rendre sans mort.
 Mais à dormir me sens dispos,
 Pour Dieu laissez moy en repos.
 Et toy Satan qui ia me vois
 Aux cris de mort & aux abbois,
 Va t'en par tout faire poursuyte
 Pour recouurer des gens d'eslite,
 Soyent Turcs, luifs, Maures, ou Tartares,
 Soyent hommes lettrez, ou barbares,
 Qui prennent en main ma defense,
 Et gardent que l'on ne m'offense,
 Soit en ma personne, ou mes biens,
 Spirituels, ou terriens.

Satan.

Reposez vous donc yn petit
 Pour recouurer vostre appetit,
 Cependant ie vay par le monde
 Tracasser & faire ma ronde
 Pour voir si ie pourray rien faire
 Qui seruir puisse à vostre affaire.
 Toutefois ie croy qu'il vaut mieux
 Que ie face yn tour aux bas lieux
 Pour narrer l'exécution
 De toute ma commission.
 Et d'autre part, il peut bien estre

Que

*Que ie fuy beſoin à mon maiſtre
Puis ſi toſt qu'à. j fait v. tour,
On me verra ci de . . ir.*

Preſtrife.

*Voilà noſtre homme . . au bas,
Touteſſois il n'en mourra pas
Si à coup, ou ie ſuis deceu.
Mais à ce que j'ay apperceu,
Encore qu'il ait quelque trefue,
C'eſt miracle s'il en releue.*

Moinerie.

*Frere, de nous penſer conuient:
Car ſi ce meſchef nous aduient
Qu'il nous laiſſe, vers qui ſera-ce
Que trouuer pourrons quelque grace?
Chacun nous hait & nous deteſte
Comme vne dangereuſe peſte.*

Preſtrife.

*Foibles ſommes de cœur & corps,
Ranger nous faudra des plus forts.*

Moinerie.

*Les autres aiment à veiller,
A peu viure, & bien trauailler:
Et nous, hélas, tout au contraire,
Voulons bien viure, & ne rien faire.*

Preſtrife.

*Hurler faudra avec les loups,
Ou faire les piteux & doux:
Et laiſſans là nos Audi-nos,
Contrefaire les Huguenaux.*

c. i.

Moinerie.

*Mais veu qu'ils ne nous peuuent voir,
Ils ne nous voudront recevoir.*

Prestrise.

*A leur refus aux Turcs irons,
Ou aux luifs nous nous allierons.
Que si là nous ne trouuons place,
Satan prirons qu'il nous en face.*

Moinerie.

*Voilà bonne conclusion,
Et sainte resolution.*

Le Pape.

*Ca tost, qu'on me change de lieu,
Par tout me suit la main de Dieu.*

Prestrise.

*On s'y en va tout promptement.
Ma saur, prenez là vistement.
Voirement où voulez vous estre?*

Le Pape.

*Qu'on me iette par la fenestre
Du haut en bas, c'est ce qu'il faut,
Aussi bien ay-ie yci trop chaud.*

Moinerie

*Frere, mettons-le en quelque part,
En lieu secret & à l'escart.
Peut-estre qu'ayant pris repos,
Il reuiendra en bon propos :
Et i'espere qu'en peu de iours
Ce mal-ci aura pris son cours.*

Prestrise.

Or sus là donc : car il est heure,

S'il

*S'il le fut onc, qu'on le sequeure.
Que s'il aduient qu'il n'en releue,
Des maux aurons sans fin ne trefue.*

Satan.

*A mon retour faut que m'employe,
Et que mes cinq sens ie desploye
A renuerser tous les desseins
De ces Huguenaux cauts & fins.
Non que ie craigne la personne
Du Pere saint, mais sa couronne.
Autrement, ie veux bien qu'il aille
Au bordeau pour chose qu'il vaille.
Mais s'il aduient qu'il soit deffait,
Enfer perdra sa vache à lait.
Voyci donc qu'il faut que ie face.
Il faut tout premier que ie brasse
Entre ces Chrestiens nouueau-nais
Discors pour les rendre estonnez.
En apres il faut que ie trouue
Quelqu'un qui forge & qui controuue
A tous propos bourdes nouuelles,
Pour esteindre les estincelles
Du grand bruit qui court de leurs faits.
Et lors en brief seront deffaits.
Car ceux qui croyent de leger,
Donront lieu, sans s'interroger,
A ce que dire on en voudra,
Ce qui mesprisez les rendra.
Puis ie desire auoir trouué
Quelque homme en malice approuué,
Qui sçache escrire en toutes langues*

c. ii.

Des inuectiues & harangues,
 Pour rembarrer & faire taire
 Ces asnes qui ne font que braire
 Contre les abus de la Messe,
 Ceste noble & braue déesse
 Qui si bien remplit nos chaudieres
 De pources ames prisonnieres.
 En apres il faut que i'ordonne
 Quelque baudet de la Sorbonne,
 Criard, mutin, opiniastre,
 Fol, insensé, acariastre,
 Soit docteur ou bien bachelier
 Rempli du zele du celier,
 Qui face tres bien son deuoir
 De mutiner & esmouuoir
 Le pource ignorant populaire
 A quelque sedition faire
 Contre ces faux Lutheriens,
 Disant que ce sont loups & chiens
 Qui sont entrez en l'heritage
 De Dieu, pour y faire rauage,
 Et mettre sainte mere Eglise,
 Si faire se peut, en chemise.
 Alors on les verra muffer
 Tout cainus, & leur ris cesser.
 Mais il faut que mes cornes cache
 Afin que mon nom on ne scache,
 Et prenant vn habit leger,
 L'aïlle en guise de messager.
 L'outrecuidé.
 Philaute.

.Philaute.

Philaute.

Sire.

L'outrecuidé.

Que r'en semble?

Philaute.

*Il m'est aduis que ie tremble,
Mais ce n'est la fieure de veau.*

L'outrecuidé.

Et puis, que dit-on de nouveau?

Philaute.

Où là?

L'outrecuidé.

Tci en mon Royaume?

Philaute.

*Il n'y a qu'yn Pierre ou Guillaume,
Et vous demandez des nouvelles.
O que nous en orrions de belles
Si les lezars & les poissons
Se faisoient entendre en leurs sons!
Mais qu'est-ce qu'yci on rencontre
Sinon qu'on trouue malencontre,
Ou bien la faim laide & hideuse,
Pour ronger nostre pance creuse?*

L'outrecuidé.

*Vray est que ce lieu est desert,
Mais ce mal à yn bien nous sert,
Qu'on ne nous vient yci fasher.*

Philaute.

*Mais on n'y trouue que mascher.
Et n'est-ce pas grand'fasherie
Que nostre ventre à la fin crie*

*Sans qu'il y ait pour l'appaiser.
Que vaut donc tant se malaiser
En vne terre inf. de
Pour vn peu sur de ce monde?*

L'outrecuidé.

*Et quoy? corps saint Iaqués paillard?
Viens tu faire yci du raillard?
Veux tu gloser sur ma grandeur
Et prestre-royale splendeur?*

Philaute.

*Sire monsieur ne vous desplaise,
Il vaut donc mieux que ie me taise.*

L'outrecuidé.

*Non fait, ie veux que tu respondes,
Moyennant que point tu ne grondes.*

Philaute.

Ce n'est pas moy, sont mes boyaux.

L'outrecuidé.

*As tu veu mes letres royaux
Touchant ma grande autorité
Sur ce pays inhabité?*

Philaute.

*Et que m'en seruira la veüe,
Si ma bedaine n'est repeüe?
Ie croy bien qu'estes vn grand maistre,
Mais si me donniez à repaistre,
Ie vous dirois plus grand d'vn tiers.*

L'outrecuidé.

Après.

Philaute.

I'y cours.

L'outre-

L'outrecuidé.

Où ?

Philaute.

*Aux sentiers**Pour veoir si point ie ne pourroye
Happer quelque lezard pour proye.*

L'outrecuidé.

*Voyez si ce paillard est rogue
De railler quand on l'interroque !
Vertu si sur toy ie me mets,
Serui seras de diuers mets.*

Philaute.

*I'aurois bien assez d'un quignon
De pain bis & d'un gros oignon.
Mais pour user de discipline
Ne vous ruez point en cuisine.
Ha si i'estois chien de mon maistre
Par de-là, i'aurois à repaistre
Mon soul de bon pain de mesnage,
Et quelque fois de gras potage :
Mais yci faut humer le vent
Voire marin, qui put souuent,
Où il n'y a suc ne substance,
Et ce pour tout pain & pitance :
Tellement qu'il faut qu'en peu d'heure
Chacun de nous parte, ou qu'il meure.
Parquoy monseigneur & mon maistre,
Mon Roy, mon Empereur, mon Prestre,
Mon Tyran, mon Pape, & mon Prince
Sortons de ceste orde prouince
Où en usage n'est le pain,*

c. iiii.

*Et n'y a ne vigne ne vin.
Allons vers nostre mere France
Qui guarira nostre souffrance.
Car yci ne scaurions plus faire
Que languir, & la mort attraire.*

L'outrecuidé.

*Quoy donc? faut-il que i'abandonne
Ce mien royaume & ma couronne?
Que deuiendrait mon Colligni
Si bien remparé & muni,
Ma Ville-henri, cité tant belle,
Qui semble vne Naples nouuelle?*

Philaute.

*Mais vn Iericho deuez dire
Car les murs y creuent de rire,
Qui sont de bouë & de crachat
Pour loger vn chien ou vn chat.
Pour Dieu, monsieur, deportez vous
De vous vanter, ou tous les coups,
Quoy qu'en soyiez trop irrité,
Je vous diray la verité:
Vous scauez que l'enten trop bien
Quel est ou n'est pas vostre bien.*

L'outrecuidé.

Quoy? faut-il qu'ainsi tu babilles?

Philaute.

*Vendez donc ailleurs vos coquilles.
De moy, ie ne me pais de songes,
Et beaucoup moins de vos mensonges.
Que si vous auez tant d'enuie
D'annoblir vous & vostre vie,*

Enuoyez

Enuoyez en France vos bourdes
 Toutes les plus grosses & lourdes :
 On croira tout, voire à credit
 Et ce sans aucun contredit :
 Car mesmes au lieu d'en oster,
 Chacun y voudra adiouster :
 Il n'y aura celuy ne celle
 Qui ne hume telle nouuelle
 Comme vn brouet délicieux
 Pour vous esleuer iusqu'aux cieux,
 Tant sont les gens legers & fots.
 Faites vostre Isle vne Samos
 Ou vne Coo plantureuse,
 Belle, fertile, & tres heureuse.
 Mandez que vous auez conquis
 Vn peuple puissant & exquis.
 Brief, mandez que vos poullaliers,
 Vos cahuetes & halliers
 Sont villes, chasteaux, forteresses
 Pleines de gens & de richesses.
 Mais à moy qui ente le per,
 Il faut plus franchement courir
 Les propos : car si peu ilis,
 Si est-ce pourtant que ne puis
 Porter ces vaines vanteries
 Ou plustost pures menteries.
 Ce que dire enten sauf l'honneur
 De vous mon maistre & mon Seigneur.
 Or ça pour abbreger le conte,
 Je croy, si ce n'estoit de honte,
 Que serions d'un aduis tout deux,

C'est d'estre en France tous breneux,
 le di, monsieur, iusqu'aux oreilles,
 Pour bien raconter nos merueilles
 A la table de quelque Prince,
 Cardinal, ou chef de Prouince :
 Le croy qu'en pourrions desmesler
 Plus que dix tordre ne filer.
 Et cependant pour le refrain
 On nous verroit aller beau train
 Tant des mains que des dents ensemble,
 Comme quand vne pouille assemble
 Le grain que l'on luy iette à terre.
 Le pain & vin auroyent la guerre,
 Aussi auroyent les bons morceaux
 Dont se farcissent ces pourceaux
 Rouges vestus, & telles bestes
 Qui ont la marque sur leurs testes.
 Monsieur, ne soyez point si sage
 Que honte vous face dommage,
 Confessez yci en secret
 (Car ie suis loyal & discret)
 Si n'estes pas las de iufner.

L'outrecuidé.

De vray, ie voudrois desjuner
 Bien souuent, que ie n'en ay pas,
 Et si fay trop peu de repas
 Pour le grand vaisseau que ie porte :
 Mais i'ay qui me ferme la porte.
 Car i'ay trop irrité les dieux
 Quand i'ay fait prescher en ces lieux
 Purement le saint Euangile

Par

Par les predicans d'une ville
 Que le Pape avec sa Prestrise
 En interdit ont pieça mise
 Apres ie me suis departi
 Du saint Pape & de son parti,
 Et pour vn profit pretendu,
 Me suis au camp de Christ rendu,
 Contrefaisant le bon Chrestien
 Pour vn temps & l'homme de bien,
 Tellement que tout le Clergé
 A sur moy son feu deschargé,
 Et me tient pour son ennemi
 Au lieu que i'estois son ami.
 Sur tous Messieurs les Cardinaux
 Qui detestent les Huguenaux,
 M'ont fait puir deuant le Roy,
 Disans que suis homme sans loy.
 Et maintenant qu'irois-ie faire
 De par de-là, sinon desplaire,
 Ou plustost la haine encourir
 Des grands, pour me faire mourir?
 L'aime trop mieux seul yci viure,
 Qu'à mon escient mon mal poursuyure.

Philaute.

Est-ce là tout ce qui vous garde
 De partir, & qui vous retarde?
 Vous demeurez en beau chemin.
 Non non, Monseigneur, i'ay en main
 Remede prest à vous donner:
 C'est qu'il vous conuient retourner
 Vn peu vostre robbe à l'enuers,
 Et tenir propos tous diuers

*A ceux que tenir vous souliez,
Et feindre comme si vouliez
Ceste ceſt ſluguenaux eſcrire
Pour vray doctrine & eux deſtruire:
Et vous vray arrez deſormais
En plus grand credit que iamais.*

L'outrecuidé.

*Ton conſeil pertinent ie trouue,
Et comme expedient l'approuue
Après que ie l'ay bien gouſté.
De faiſt, ie ſuis bien deſgouſté
De ceſte nouuelle doctrine
Qui tout plaifir mondain ruine,
Et qui veut ainſi retrancher
Tous les ſoulas de noſtre chair.
Quant à moy, j'aime le deduit,
De Venus de iour & de nuit:
Outre plus, ie tien de mon peré
Que j'aime à faire bonne chere:
Dont ceſte loy qui par contrainte
Veut rendre la perſonne ſaincte,
Ne me vient trop bien à propos,
Aimant mon aife & mon repos.
Parquoy ſuyure ie veux la voye
Du monde, en plaifir & en ioye,
Et de faiſt, ie me delibere
De ne plus yci ſeiour faire.*

Philaute.

*Or que voyla yn bon propos.
Tandis que vous eſtes diſpos,
Je m'en vay ſans plus arreſter*

Au

*Au port, le nauire apprestier.
 Monsieur, donnez ordre par tout,
 Et ie viendray du reste à bout.*

L'outrecuidé.

Si ie fay tout, tu n'as que faire.

Philaute.

*Ho, i'enten quant à vostre affaire.
 De moy, ie ne suis pas si fin.
 Pour Dieu faites tost vne fin.
 Ha mon pource ventre en mal-aise
 Tu es plat comme vne punaise,
 Mais si iamais suis de retour
 Tu auras bon temps à ton tour.*

L'outrecuidé.

*Or sus, qu'on face bonne garde.
 Adieu vous di, & qu'on se garde
 Des surprises & des efforts
 Des voisins qui sont les plus forts.*

Philaute

*Allons mon Roy, entrez dedans,
 C'est trop fait l'alchumie aux dents,
 Allons au bon pays de France
 Pour refaire vn peu nostre pance.*

L'outrecuidé.

*Tu retournes à tes moutons.
 Or sus donc auance, & partons.*

Philaute.

*Arriuez sommes à bon port
 Apres meints effrois de la mort.
 Il sera bien mon ami cher
 Qui me fera plus cheuaucher*

Les poissons & la mer bruyante :
 C'est assez fait, ie m'en contente.
 Mais puis que nous nous departons,
 Ie vous pry Monseigneur contons.
 Car vous scauez bien l'ordinaire,
 Qu'à tout seruice est deu salaire.
 Partons donc d'ensemble contens.
 Ie vous ay serui si long temps
 En ces deserts de l'Amerique,
 Nud comme vn ver & famelique :
 Et cependant ie n'ay receu
 Vn seul faux sols qu'aye apperceu
 L'outrecuidé.

Philaute, loyer differé
 N'est pas perdu ni esgaré.
 Tu scais qu'ares desnue suis,
 Mais si iamais retourner puis
 En credit, tu te sentiras
 De mon heur, & premier seras
 De ma maison, mais pour ceste heure
 Trouuer te faut qui te sequeure.
 Adieu Philaute.

Philaute.

Adieu mon maistre,
 Ie m'en vay chercher à repaistre.
 Pourchassez vous, si vous voulez,
 Et iusqu'au creuer vous soulez.
 Nous voyla sur la planche aux vaches,
 Chacun de nous face ses paches
 Comme il entend : car de ma part
 Ie me retire en autre part.

L'outre-

L'outrecuidé.

Or ça, puis que suis de retour,
 Aller me faut tout droit en Cour
 Pour sçavoir quel conte on fera
 De moy, quand on me reuerra.
 Mais ie suis en grande destresse,
 Pensant vers qui prendray adresse.
 Aller me faut vers l'eschançon
 Du bon Chancelier d'Alançon,
 Où iadis aller ie souloye
 Quand vn peu fourrer ie vouloye
 Mon pourpoint, & quand à vray dire
 Il n'y auoit chez nous que frire :
 Là au flair de la fricassée
 i'ay beu de vin meinte tasse.
 Estaller donc y faut boutique
 Pour continuer la rubrique :
 Je ne scay pour ma friandise
 Allieurs meilleure chalandise.
 Hola mon ami sommelier
 De monseigneur le Chancelier,
 Où estes vous ? Nul mot ne sonne,
 Je croy qu'il n'y a plus personne.
 Corps saint ! laqu'ou suis-ie rangé ?
 Je voy que l'estat est changé,
 Je ne scay pas qu'il me faut faire,
 Si ie doy crier ou me taire.
 Si faut-il faire mes approches.
 Ho cuisiniers & tourne-broches,
 Mes bons & anciens chalans.
 Mot. Vertu qu'ils sont nonchalans

De

De respondre à leur grand ami.
 Au moins cognoissez à demi
 Ce grand corps de Villegaignon,
 Auez vous oublié mon nom?
 Pas vn mot. Que sera-ce ci?
 Je commence à prendre souci
 Voyant que nul ne me caresse.
 Je voy bien que n'auray adresse
 En ce lieu, pour auoir butin,
 Sinon en crachant mon Latin
 Contre ces freres Huguenaux
 Ausquels chacun veut tant de mal'x.
 Mais il vaut mieux prendre la guise
 D'vn reuerend prestre d'Eglise,
 Sans deroguer à ma couronne
 Et prestre-royale personne.
 Car les armes ne quitteray,
 Ains d'vn costé m'equipperay
 Comme vn vaillant homme de guerre.
 Puis la robbe trainant à terre
 L'autre costé honorera
 Et le bonnet rond couurira
 Mon chef avec mon diadesme
 Tesmoin de ma grandeur supresme.
 Tellement qu'en cest equipage
 On me tiendra pour preux & sage.
 Voyla comme Philaute dit
 Que recouureray mon credit.
 Je m'en vay donc sans plus attendre
 Toute ceste pareure prendre.

L'ambiti-

L'ambitieux.

*Vrament il m'en a bien donné
Ce gentil monsieur Dieu donné.
Saint Manenda comment il frotte ?
Il ne m'est pas demeuré crotte,
Tant il m'a viuement secoux,
Et chassé de mon dos les poux.
Que si ce n'estoit peur de honte,
Et que de moy on ne feist conte,
A bon escient ie me tairois,
Et à luy plus ne me prendrois.
Mais il faut en forte putain
Avoir bon front. Sus mon Latin
Frippé, coufu, & regratté,
Que ce galand soit bien gratté,
Qui veut que Dieu iuste & parfait
Soit cause du mal qui se fait.*

Satan.

*Voyci mon cas. Ho, monsieur, ho,
Monsieur de paruo castello.*

L'ambitieux.

*Hola, qui m'a ainsi nommé ?
C'est signe que suis renommé
En meints endroits, puis qu'on m'appelle
Par mon nom. Quoy ? quelle nouuelle ?*

Satan.

*Le Pape m'a vers vous transmis
Pensant qu'estes de ses amis,
Scauoir si vous voudriez rien faire,
En bien payant, qui peust desplaire
A ces Huguenaux, Martyristes,*

d. i.

*Caluinistes, Bullingeristes,
Qui ont remis sus ceste Cene
Qui nostre Messe a rendu vaine.*

L'ambitieux.

*Quant à moy, vn chacun ie sers,
Pour argent, en prose ou en vers :
Aussi ne vi-ie d'autre chose
Que d'escire en rime ou en prose.
Qui plus est, mon affection -
Ne tend qu'à la perfection :
Et aussi i'espere de faict
Qu'en bref temps ie seray parfait.
Car on me donne la louange
Que suis desia vn petit Ange,
Paifible & doux comme vn agneau,
Aimant bien le ius du tonneau,
Et buuant quelques fois carhous
Auecques mes compaignons doux,
Fort familier & populaire,
Subtil à induire & attirer,
Par beaux dictz chacun qui me hante,
Tant qu'on dit que ie les enchante.
Mais si ne suis-ie pas Papiste.*

Satan.

Qu'estes-vous donc ? bon Atheiste ?

L'ambitieux.

*Je suis qui ie suis sans nommer,
Je me fay par tout renommer
Par mes œuures tant bien polies.*

Satan.

Ou bien plustost par ses folies.

L'ambi-

L'ambitieux.

*Parquoy s'il veut que sur l'enclume
le mette marteau, ou la plume
Sur papier, qu'il monstre cliquaille,
Car ie veux que deuant elle aille,
Et puis on verra de beaux ieux
Contre ces galans outrageux
Qui font ainsi cruelle guerre
A la Messe & au Dieu de terre.*

Satan.

*Non, non, croyez qu'il n'est point chiche,
Et d'autre part est assez riche
Pour recompenser amplement
Quiconque luy sert promptement.*

*En voyla desja vn des nostres.
Il reste de trouuer les autres.
Adieu, ie luy feray entendre
Qu'estes prest de deuoir luy rendre.*

L'affamé.

*Et que le grand diable y ait part,
Si i'eusse auancé mon depart
Ceci ne fust point aduenue.
Saint Eustace m'a retenu,
Ce beau Curé de triqueniques,
S'amusant apres ces guenipes.
Vertu, s'il n'en est chapitré,
Et comme il merite accoustre,
Pour mourir ie ne ferois pas
Pour la Sorbonne encor vn pas.*

*Et toy notable Paternier,
N'es-tu pas vn grand lanternier*

Dè m'auoir ainfi retenu
 Et tousiours en abboy tenu
 Tant que tes bottes fussent prestes,
 Et ton chaperon des grands festes.
 Que mal gré en ait Proserpine,
 Tu m'as fait faire vne gesine
 De sept mois dedans vn croton,
 Où meint esprit & meint luiton
 M'ont fait la guerre en telle sorte
 Que i'en ay la fressure morte.
 Et puis, les poux, pulces, punaises,
 En pension pleines & aises
 Ont esté entour de ma chair,
 Qui m'ont ainfi fait dessecher.
 Et puis tu veux que ie m'en taise:
 Non, atten-le aussi chaud que braise.

L'hypocrite.

Hillot, à t'ouyr gaçouiller
 Tu me voudrois bien embrouiller
 En ta fange & en ton ordure:
 Mais ie perde Prestrise & Cure,
 Voire mesmes mon reuenu,
 Que i'ay tousiours si cher tenu,
 Que si tu m'auois accusé
 Avec ton babil tant rusé,
 Ie t'en ferois bien repentir
 Pour vn peu t'apprendre à mentir.

L'affamé.

Ne scais-tu pas gentil Curé
 Que tu as ma bourse escuré
 Sous couleur de faire vn voyage

Au

*Au nom de tout le Papelage?
 Tu en as eu des escus meints,
 Et puis tu en laues tes mains,
 Apres m'auoir mis en l'orniere
 Où i'ay payé la folle enchere.
 Non, ie diray.*

L'hypocrite.

Que tu diras?

L'affamé.

Chose de quoy tu ne riras.

L'hypocrite.

*Garde toy de desbagouler
 Propos qui me puisse fouler,
 Autrement.*

L'affamé.

Que me feras-tu?

Je ne te crain pas vn festu :

Tel menace qui ha grand peur.

Non, Paternier, tien toy tout seur

Que i'ay vne fort bonne enuie

De deschiffrer au long ta vie.

L'hypocrite.

Va malotru, va affamé,

Que si tu m'auois diffamé,

(Quoy que dire de ma personne

Chose ne puisses finon bonne)

Tes reins tout soudain sentiroient

Combien mes deux poings peseroyent.

L'affamé.

Te souuient-il plus grand Lambin,

Grand Claquedent, grand Fesse-pain,

Qu'un iour vn seigneur d'Orleans,
 Chez luy, quand tu estois leans,
 Ferma tout bellement son huis,
 Pour te ietter dedans son puits?
 C'estoit ie croy pour ta vertu,
 Dont tu es si bien reuestu.

L'hypocrite.

Vrament tu as bien de quoy rire,
 Je tien cela pour vn martyre.
 Car i'estois allé l'inciter
 A quelque guerre susciter
 Contre ces faux Lutheriens.
 Mais toy prince des ruffiens.

L'affamé.

Si tu dis.

L'hypocrite.

Ouy da, ie diray.

L'affamé.

Et moy ta teste couuriray
 De ma patte, afin de t'apprendre
 S'il te faut contre moy mesprendre.

L'hypocrite.

A l'aide, à l'aide la Sorbonne,
 Il a deffacré ma couronne!
 O miserable sacrilege!
 Qui t'a donné ce priuilege
 De toucher à la sainte marque
 De nostre saint Pere & Monarque?
 Or ie ne chante iamais messe
 Si i'ay d'aller repos ne cesse
 Tant que i'auray monstre mon mal

A mon-

A monseigneur l'official.
 Secourez-moy, ie ne voy goutte
 Tant le sang sur mes yeux degoutte.

L'affamé.

Or va vers Thoine ou Marion,
 Si auras-tu ce horion.

Le zelateur.

Et dea, magister Desire'
 Vos estis bene choleré.
 Ie disois que deuiendriez sage
 Apres auoir este en cage.

L'affamé.

Quoy? me voyla en ma chemise
 Pour auoir serui mere eglise.
 Au reste, quant à vos promesses
 Ne me les payez point en messes
 Ni en requiescans in pace,
 Ie n'en ay que trop amassé,
 Et n'y a iour que ie n'en oye,
 Pour Dieu que i'aye autre monnoye,
 Ie suis assez hypothéqué
 Sans que rien me soit resequé
 Du salaire qu'on m'a promis
 Pour m'estre en si grand danger mis.

Le zelateur.

Messire Artus, ie vous assure
 Que vostre recompense est seure:
 Mais si elle vient vn peu tard,
 Prendre vous faut en bonne part.
 Scauez-vous pas que le saint Pere
 Ha assez grande gibbeciere?

d. iiii.

Tenez donc bon, & ne vous chaille,
 Car vous n'y perdrez pas la maille.
 De moy, tant que la mort me hape,
 Je seray seruiteur du Pape.
 Car ie hay par trop ceste secte
 Des Luthers, tant orde & infecte.

L'affamé.

Aussi veux-ie bien le seruir,
 Pourueu que puisse desseruir
 Quelque Prebende ou quelque Cure:
 Sinon, fidam, ie n'en ay cure,
 Car d'ainsi me mettre au hazard
 D'encourir la corde ou la hart,
 Et cependant demeurer vuide,
 Fait plus grand despit qu'on ne cuide.
 Mais seur espoir de recompense
 Fait decliner la conscience,
 Pour se vendre ou bien se loer
 A quelque fort nœud desnouer,
 Ou mettre vn cousteau au trauers:
 L'enten de tourner à l'enuers
 Le droict de cil qui n'ha puissance
 D'empescher effort ou nuisance,
 Ce que vous & moy ferons bien
 Sous le titre & nom de Chrestien:
 Mais si la croix ne va deuant,
 Nul de nous ne s'y dit scauant.
 Parquoy puis que le Pape est riche,
 Qu'il ne nous laisse point en friche.
 N'estes-vous pas de cest aduis,
 Dicite gramina gros bis.

Le zela-

Le zelateur.

*A bon escient ie vous accorde
 Qu'on ne peut bander l'arc sans corde.
 Aussi nostre zele feruent
 Deuient bien lasche & mol souuent
 Faute de l'engraisser & oindre,
 Tant qu'il ne peut mordre ne poindre :
 Mais si tost qu'un peu on l'engraisse,
 De se demener il n'a cesse.
 Tesmoin qu'in Scripturis sanctis.
 Dict est, Bouis trituantis
 Buccam tu non alligabis.
 Il nous faut viures & habis
 En seruant mere Eglise, & pource
 Ie di qu'il faut argent en bourse.
 Mais Artus, ne perdez courage,
 Le Pape est assez bon & sage
 Pour vous pouruoir en temps & lieu,
 Ne vous fiez vous pas en Dieu?*

L'affamé.

*Ouy bien, mais c'est sur bon gage:
 Vous entendez bien mon langage.
 J'aimerois mieux un Tien contant,
 Qu'un Tu l'auras valant autant
 Ou dix fois plus à l'aduenir,
 Il n'est rien tel que de tenir.*

Le zelateur.

*Pour un espion de Sorbonne
 Vostre raison est sainte & bonne.
 Si messieurs de la Faculté
 N'auoyent plus de difficulté*

*A accorder la difference
 Des poincts qui sont en conference,
 Ils ne gratteroyent tant leurs testes,
 De peur d'estre reputez bestes,
 Et que la marmite ne verse
 En ceste haireuse traaverse
 Par où il leur conuient passer,
 Et voir la messe trespasser,
 Nostre bonne mere nourrice,
 Et quitter aux Luthers la lice.
 Ce sont propos auantageux,
 Artus, motus : c'est à nous deux.
 Peut estre aussi que le saint Pere
 Nous gardera de vitupere.*

Satan.

*Voyci mon cas sans aller loin,
 Tout me vient à point au besoin.
 Hola, Messieurs, scauez-vous lire?*

Le zelateur.

*Lire dea? voire bien escrire.
 Nous sommes ia maistres passer
 Et d'estudier tous casser.*

Satan.

*Voyci, j'apporte vn blanc-signé
 De la main du Pape signé,
 Afin que tous ceux se souscriuent
 Qui volontiers pour luy estriuent
 Contre ces maudits Huguenaux,
 Qui ores luy font tant de maux.*

L'affamé.

Leur promet-il quelque salaire?

Satan.

Satan.

Et quoy donc? que scauez vous faire?

L'affamé.

*Messager, as-tu tant viré
Sans cognoistre Artus Desiré,
Ce grand Poëte & fort scauant,
Qui a fait ce beau Passuant?
C'est moy-mesme que vous voyez,
Afin qu'aduerti en soyez,
Mais ie veux auoir recompense,
Et que le Pape me dispense
Des bourdes à grand'quantite
Que ie forge par charite,
Pour faire puir ces meschans
Qui sa ruine vont cherchans.*

Satan.

*O mon ami, que ie t'embrasse!
C'est toy que ie cherche à la trace.
Fay bien ton deuoir de mentir,
Et ie t'en feray garentir,
Et donner pour ton bon seruice
Quelque gros & gras benefice.*

L'affamé.

*Ie remercie la grandeur
De monseigneur l'Ambassadeur.
Mais ie scay vn grand personnage
Fort eloquent, subtil & sage,
Qui ha vn zele si bruslant
Qu'il va par les temples vrlant
Contre ceste secte maudite
Qui tant le Pere saint despise.*

*Cestuy-là seul pourra suffire
 A tous ces Huguenaux destruire.
 C'est Magister nostre Maillard.
 Satan.*

*Qui donc? nostre maistre paillard?
 Ce venerable Sodomite.
 Non, non, Artus ie te le quitte,
 Garde-le pour chose qu'il vaille,
 Ce Maillard qui ne vaut pas maille.
 Je n'en veux point, c'est vne idole,
 Vn asne, vn grenier à verole,
 Vn chien qui iappe, & ne peut mordre,
 Qui scait fort bien la gueule tordre,
 Hannir, cracher, moucher, touffer,
 Et ses longues manches trouffer,
 Taper des pieds, claquer des mains,
 Ietter çà & là regards meints
 Et faire des yeux l'auantgarde
 Pour veoir si chacun le regarde:
 Car il s'estime estre le veau,
 De la Sorbonne le plus beau.
 Tellement qu'il s'attiffe & farde
 Ne plus ne moins qu'une paillarde,
 Et en Guillemete ou Lubine
 Il peint sa face cherubine,
 Iettant son lirippion
 Iusques sur son gros croupion,
 Et en guise de caurechef
 Met son bonnet rond sur son chef.
 Puis afin d'estre plus luisant
 (Dire faudroit plus seduisant)*

Et qu'à

Et qu'à mal les cœurs il embrase,
 Il a toujours la barbe rase,
 Dont son menton quelque peu gris
 Tirant sur bleu en verd de gris
 Est de petis trous tout mélé
 En coine de pourceau brulé:
 Contrefaisant le iouuenceau,
 Ou bien le vierge & le puceau,
 Combien qu'il soit vn bouc banier
 Des plus ords qu'on sceust manier.
 Aussi pour se monstrier plus saint
 Il est souuent sur le cul ceint,
 Et va sur sa mule enhouffée
 Pas à pas comme vne espousée.
 Mais au reste il n'ha que la iappe,
 Qu'est-ce donc qu'en feroit le Pape?

Mais vous nostre maistre bourré,
 Qui portez chaperon fourré,
 Auez vous quelque rhetorique
 Au contoir de vostre boutique,
 Pour bien ces Huguenaux galer,
 Et leur haut caquet raualler?

Le zelateur.

Domine, parlez par moyen,
 Si nescis, ie suis le Doyen
 De Sorbonne, ou ie preten l'estre,
 Et on me nomme nostre maistre
 Nostre maistre Demochares,
 Celuy qui dicte les arrests
 Des Huguenaux qu'on met au feu,
 C'est moy qui les mets tous en ieu,

Et qui par tout les va faschans,
 Et leurs estudes recherchans :
 Où quand liures y sont trouuez
 Par la Sorbonne reprouuez,
 C'est moy qui soudain les fay prendre,
 Et de leur foy bon conte rendre.

Satan.

Nostre Maistre, ne vous desplaise,
 Vostre zele chaud comme braise
 Ne m'estoit encores cognu.
 Mais i'ay le tout bien retenu,
 Et si bon recit en feray,
 Que vostre bruit auanceray.

Le zelateur.

Gratias ago nuntie.
 Perdiam, i'estois bien soucié
 De me faire cognoistre au Pape.
 Il faut desormais que ie iappe
 Plus haut & clair contre Luther,
 Cela pourroit bien inciter
 Nostre saint Pere à me pourvoir
 De ce que ia voudrois auoir.

O poure Sancta Marias,
 Mater Dei, qui harias
 Si bien en chaire ces meschans,
 Qui nos bouges vont recherchans.
 Pauper magister Picardi,
 De nos maistres le plus hardi !
 Si tu viuois, ie puis bien dire
 Qu'on les garderoit bien de rire.
 Mais quoy, hélas, tu es trop loïn

P. , pouuoir mouiller ton groin.

Mais nuntie, ie vous aduise
 Qu'vn homme de nostre chemise
 S'est mis ces iours-ci en auant
 Qui est fort rusé & scauant,
 Et les gale bien dos & ventre.
 Scauez-vous qui? Monsieur le chantre,
 Dit Gabriel de Saconay.

Satan.

Qui? cestuy-la? il n'est pas nay,
 Il est encor en la coquille,
 Il m'en faut vn qui mieux fretille.
 C'est mieux son cas d'entretenir
 Putains & ieux, que de tenir
 Propos de telle consequence.

Le zelateur.

Mais voirement, quand bien i'y pense,
 Frater maistre Benoiſt Pouſſot.

Satan.

Frater maistre Benoiſt tout sot,
 Nostre maistre mes vieilles brayes :
 Ce sont autant de mortes payes.
 Laisse ces asnes sans scauoir,
 Et pense de faire deuoir.

Le zelateur.

De ma part, tenez-vous tout seur
 Que seray ferme comme vn mur.

Satan.

Et trois. Il n'en reste plus qu'vn.
 Tout beau, voyci venir quelqu'vn.

L'outrecuidé.

*Cælum non animum mutant qui trans mare currunt.
Cedant arma togæ, concedat laurea lingua.*

Satan.

*Ce rustre-ci a bien bringué,
Et semble aduis à son plumage
Que ce soit quelqu'oiseau sauvage.
Ho, qui es-tu?*

L'outrecuidé.

*Qui? ma personne?
Elle sert à qui plus luy donne.*

Satan.

*Mais que veut dire ce flageol
Que ie te voy pendu au col?*

L'outrecuidé.

*C'est que babil point ne me manque,
Et de mesdire ie rien banque.*

Satan.

*Que veut dire ce diadesme,
Et ce bonnet tourné de mesme?*

L'outrecuidé.

*C'est que de la France Antardique,
Où j'ay dressé la Republique,
Et de mon cerueau fait la loy,
Ie suis le grand Prestre & le Roy.*

Satan.

*Quoy, grand Prestre? gentil Satrape,
Il n'y a au monde qu'un Pape,
Ie maintien cela pour ma vie.*

L'outrecuidé.

Et dea, ie ne luy porte enuie

Mais

*Mais cela est vn autre monde
Sur quoy ma Papauté ie fonde.*

Satan.

*O le grand Geographien,
Ou plustost, le grand ruffien,
Avec son equipage estrange,
Qui deux mondes dedans vn range!
Mais dont vient que tu te desguises
En tant & si diuerses guises?*

L'outrecuidé.

*Vrament, tu en as bien affaire.
Et c'est que ie scay bien tout faire.
Ie suis, Aduocat, Orateur,
Courtisan, & grand affronteur,
Cheualier, Gendarme, Pyrate,
Qui moyennant vne fregate
Escumeray toute vne riue,
Voire aussi bien qu'homme qui viue.
Et quoy? ne sçais-tu pas mon nom?
On m'appelle Villegaignon.
Vray est qu'on me nomme au village
Colas Durand, Colas peu-sage:
Mais par mes actes de prouesse
I'ay acquis titres de noblesse.*

*O Roy François, tu m'annoblis,
Tefmoin la rouge fleur de lis
Que i'ay encore sur l'espaule
Comme vray enfant de la Gaule.*

*Ce Lifet ne fait iamais mieux
Quand au gré de mes enuieux,
Me defendit d'aduocasser.*

*Cela m'a tant fait tracaſſer
Qu'en ſuis devenu gentilhomme.
Voirement, ſuis-ie pas bel homme?
Droit-on pas à mon corſage,
Que ie ſuis vaillant perſonage?*

Satan.

*On ne diroit rien de nouveau,
Tu es vn grand & maiſtre veau:
Et ſemble bien à veoir ta mine,
Que tu es vaillant en cuiſine.*

L'outrecuidé.

*Mon ami, quand ie ſuis dedans,
Ie vay tant des mains que des dents
Fort vaillamment, & ie t'aſſeure
Que rien deuant moy ne demeure.
Quoy que ce ſoit, ie veux bien viure.*

*Mais as-tu point veu vn gros liure
En Latin, que i'ay compoſé
Après que i'auois repoſé
Mon vin de la collation?
C'eſt vn œuure en perfection
Bien fait, & duquel la memoire
M'acquerra immortelle gloire.*

Satan.

*Ceſte louange eſt vn peu louche
Procedant de ta propre bouche.
Mais contre qui t'adreſſes-tu?
Contre le Pape?*

L'outrecuidé,

*Non, vertu,
Mais contre vn Richer & les ſiens.*

Ie les

*Ie les accoustre bien ces chiens,
 Qui ne veulent pas que Dieu soit
 En la messe, au pain qu'on reçoit.
 De l'an ne passera sepmaine
 Qu'ils n'ayent la fieure quartaine
 De grand frayeur que leur ay fait.
 Ami, les voyla bas, c'est fait.
 Iamais ne leueront le nez.*

Satan.

*Si ne sont-ils pas estonnez
 De peu de chose, & ont grand zele
 A bien maintenir leur querele:
 Et gage qu'auant qu'on vendange
 Qu'ils t'auront bien rendu ton change.*

L'outrecuidé.

*Ie ne les crain ne morts ne vifs
 Fussent ils Sarrazins ou Iuifs.*

Satan.

*Voyci tout vn tel personnage
 Qu'il me faut: ie ne suis pas sage
 Si des miens ie ne le retien.
 Or ça, monsieur, voudrois tu bien
 Entrer au seruice du Pape?*

L'outrecuidé.

*Ouy bien, pourueu que i'attrape
 Quelque butin pour recompense.
 De moy, i'aime à farcir ma panse.*

Satan.

*Tu auras des biens tant & plus:
 Il ha de tout moins que d'escus.*

L'outrecuidé.

Mon ami, sçais-tu? Le chapeau.

Satan.

*Quoy donc? i'acheteray la peau
Au marché pour auoir la laine,
Que teindre feray en migraine :
Puis le Pape la benira,
Et ton gros chef en courira.*

L'outrecuidé.

*Sçais-tu? ie ne le veux pas nud,
l'enten avec le reuenu.
Car ie di qu'en tout sacrement
On conioint ordinairement
La verite avec le signe.*

Satan.

*Tien ce papier, & te souffigne,
Car c'est le blanc-signé du Pape.*

L'outrecuidé.

*Voyla mon nom, Colas satrape,
Colas le fol, Colas le roy,
Colas sans Dieu, Colas sans loy.
Or tu diras au sanctissime
Que pour luy suis paratissime.*

Satan.

*Or ça, ie suis venu à bout
De mon affaire iusqu'à tout :
Ie m'en vay donc tant que ie puis,
Car on ne scait pas où ie suis.
Mais vers le Pape faut passer,
Afin de le detrespasser,
Et luy conter tout mon brassage,
Qui est bien à son auantage.*

Verite.

*Verite suis de Dieu la fille aisnee
 Pour le salut des humains ordonnee,
 Voire de ceux qui en perseuerance
 Auront en luy foy & ferme assurance.
 Or a-il veu de ces supremes cieux
 Tous les complots de ces malicieux
 Qui ont desir, & font leur entreprise
 De ruiner du tout sa poure Eglise.
 Les pleurs aussi, cris & gemissemens
 De ses enfans, & les tant grieux tourmens
 Qu'ils ont soufferts, deuant luy sont montez,
 Et les a tous bien pesez & comptez.
 Parquoy du ciel çà bas m'a fait descendre
 En ces durs temps, pour les foibles forts rendre,
 Pour consoler les esprits angoissez,
 Et soulager ceux qui sont oppressez.*

*Petit troupeau doncques tant precieux,
 Et tant aime du puissant Roy des cieux,
 Ne perdez point confiance & courage
 Pour les efforts & furieuse rage,
 De ces meschans: car vostre patience
 Surmontera en fin leur violence.
 Las ie scay bien que grands sont vos effrois,
 Et bien pesant le fais de vostre croix:
 Mais celuy-là qui veut que vous souffriez
 Et qu'à la mort pour luy vous vous offriez,
 Comme vaillant & loyal capitaine
 A le premier pour vous porté la peine:
 Luy di-ie iuste au nom de vous coupables,
 Luy tout parfait pour vous tant miserables.*

c. iii.

*Et a tant fait, malgré d'enfer l'enuie
 Qu'en se liurant, vous a rendu la vie,
 Voire vne vie heureuse & eternelle
 Accompagnant vne ioye immortelle.
 Craindrez vous donc vne mort transitoire.
 Dont l'issue est toute pleine de gloire?*

*Non, non, enfans du Seigneur bien-aimez,
 Les maux presens condignes n'estimez
 Au bien futur, puis que son excellence
 Est par dessus humaine intelligence.*

*Vray est qu'aurez au monde oppression,
 Et ne serez sans persecution:
 Mais soustenez contre toute greuance
 En endurant: car vostre deliurance
 Ne tardera, pour auoir la couronne
 Que Iesus Christ à ses fideles donne.
 Et lors tous ceux qui contre luy se dressent,
 Et ses enfans cruellement oppressent,
 Verront celuy lequel ils ont percé
 Et leur estat florissant renuersé:
 Car ils rendront compte de tous leurs faits,
 Et receuront loyer de leurs meffaits.*

L'Eglise.

*O Dieu haineur de mensonge,
 Tant sont grands tes iugemens!
 Il m'est aduis que ie songe
 Pensant à ces changemens.*

*Il n'y a rien que tempestes
 Nous suyuoient de toutes parts,
 Estans comme pources bestes*

Par

'Par champs & forests espars.

*Nous estions comme brebis
Trainez à la boucherie,
Nous n'oyons rien que tuerie
En proye & pillage mis.*

*Ce Cacus monstre infernal
Qui triple couronne porte,
Seant au grand tribunal,
Nous greuoit en toute sorte.*

*Puis Polyphemus son frere,
Ennemi de verité,
Contre nous fort irrité
En tout nous estoit contraire.*

*Leurs violens estaffiers
Pleins de cruaute & rage
Se tenoyent contens & fiers
De nous faire tout outrage.*

*Tant qu'il n'y auoit berger
Ne brebis parmi les champs
Que ne veinssent ces meschans
Iusqu'en leur parc outrager.*

*Feux, glaiues, prisons, tourmens,
Blasmes, reproches, iniures,
C'estoyent les bons traitemens
De tes pources creatures.*

*Il n'y auoit pource agneau
Ne mouton qui veinst en place
Que ceste maudite race
Ne luy rauist laine & peau.*

*Or a3-tu tourné la chance
Par ta clemence & bonté,
Ayant en vn coup donté
Les deux chefs de ceste engeance.*

*Ces deux monstres furieux
Ont bien soudain fait le saut,
Et ton bras victorieux
Leur a liuré dur assaut.*

*Ils pensoient bien ces geans
Pleins de nuisance & moleste
Grauir au throne celeste,
Pour te ietter de leans,*

*Mais d'vn clein d'œil seulement
En ta fureur & ton ire,
Tu leur as monstré comment
Tu les pouuois desconfire.*

*Tellement que ton troupeau
Qui fuyant leurs durs encombres
Ne se tenoit qu'en lieux sombres,
Voit ores ton soleil beau.*

*Dont sans fin ton los & gloire
Irons par tout racontans,
Pour rafreschir en tout temps
De ton secours la memoire.*

FIN

Réimprimé à Genève par les soins
de M. Gustave Revilliod
chez I.-G. Fick.

1859

* *

*



Z

41.9

33425

GIUSEPPE MASI
RESTAURATORE
FIRENZE

